



Cumün da Valsot

Tel. +41 (0)81 861 00 60 • Fax +41 (0)81 861 00 61 • info@valsot.ch • www.valsot.ch

Poz 86 • CH-7556 Ramosch

Affischa

Suprastanza cumünala dals 10.02.2020

Presidi: Peer-Puorger Victor
Partecipant/s: Mayer-Schlegel Armon
Caviezel-Domenig Ursina
Kirchen-Werro Armon
Riatsch-Fedi Fadri
S-chüsà:
Protocol: Oswald Gian Claudio
Fabrica: Paulmichl-Rodigari Albin
Giast/s:

tractandas	tema	responsabel
1	0120 Executiva Acconsentimaint protocol	tuots
2	0220 Uffizi da fabrica Dum. da fabrica no. 053/2019, chamonna da üert, Häfner-Demonti Jon, parcella no. 150, Las Costas 82C, 7556 Ramosch	vp/ap
3	0220 Uffizi da fabrica Dum. da fabrica no. 002/2020, senda da spassegiar nouva (Barandias), Cumün da Valsot, parcellas no. 7078 e 7064, 7559 Tschlin	vp/ap
4	0220 Uffizi da fabrica Dum. da fabrica no. 006/2018, fabrichar oura il plan sura da la chamonna, Moll Daniel, parcella no. 10955, Griosch 244, 7557 Vnà	vp/ap
5	0220 Uffizi da fabrica Dum. da fabrica no. 053/2018, Prelevaziun d'aua our d'auals da surfatscha (Val Pitschna e Val Gronda), Meglioraziun Tschlin Contrat da concessiun per retrar l'aua da sauaziun	vp/ap
6	0220 Uffizi da fabrica Dum. da fabrica no. 052/2018, Prelevaziun d'aua our d'auals da surfatscha (Val Puntot), Meglioraziun Tschlin	vp/ap

Contrat da concessiun per retrar l'aua da sauaziun

7	9630 Stabels da la facultà da finanzas Sanaziun don d'aua sala polivalenta Tschlin Dumonda da credit	vp/ap
8	0220 Uffizi da fabrica Proget via da velos Ischla Rov - Strada Posiziun da l'uffizi per la natüra e l'ambiant	vp/ap
9	2100 Scoula Proget strategia scoula da Valsot e lös da scoula Ramosch e Strada Elecziun da la gruppa da lavur	vp/ap
10	7201 Provedimaint d'aua persa Sarinera Martina Bieraria Tschlin	vp/ap
11	0120 Executiva Orientaziuns	tuots
12	0120 Executiva Varia (suprastanza cumünala)	tuots

0120 Executiva

7 Acconsentimaint protocol

Il protocol da la sezzüda dals 20 da schner 2020 vegn approvà.

0220 Uffizi da fabrica

8 Dum. da fabrica no. 053/2019, chamonna da üert, Häfner-Demonti Jon, parcella no. 150, Las Costas 82C, 7556 Ramosch

Il petent ha inoltrà la dumonda per fabricar üna chamonna da üert. Per realisar tala vaiva el da procurar l'acconsentimaint dal vaschin, quel es uossa avantman. La chamonna vain realisada in lain cun üna fundamainta da soccals da beton ed ün tet da tola.

La suprastanza va d'accord culla proposta da la direcziun e decida d'acconsentir il permiss.

0220 Uffizi da fabrica

9 Dum. da fabrica no. 002/2020, senda da spassegiar nouva (Barandias), Cumün da Valsot, parcellas no. 7078 e 7064, 7559 Tschlin

Il manader tecnic orienscha, cha i'l territori da Barandias vegn realisada üna nouva senda. Adrian Schorta ha fat sclerimaints pro l'uffizi per la natüra e l'ambiant in connex cullas differentas zonas. Davart dals paur chi mettan ad alp lur armaints in quel territori d'eira gnü giavüschà ün aboccamaint. Quel ha chattà lö la fin da schner insembel cun Armon Kirchen ed Adrian Schorta. A quell'occasiun han ils paur pudü inoltrar lur giavüschs ed i han pudü gnir scleridas lur dumondas. Davart dal cumün vegn pretais cha'ls paur construischan saivs da pasculaziun sur e suot la senda. Quist oblig vegn resguardà i'l proget. Üna da quellas saivs vegn finanziada dal cumün (organisaziun da turissem). Sclerimaints preliminar tras il manader tecnic pro Petra Spescha (ARE) ha demuossà cha davart da l'uffizi pel svilup dal territori vegn pretais cha quista senda gnia tutta sü illa planisaziun da cumün.

La suprastanza va d'accord cul intent e decida d'invier il proceder dal BAB.

0220 Uffizi da fabrica

10 Dum. da fabrica no. 006/2018, fabricar oura il plan sura da la chamonna, Moll Daniel, parcella no. 10955, Griosch 244, 7557 Vnà

La suprastanza tratta e decida sur da la reconstrucziun da la chomonna da sar Daniel Moll.

0220 Uffizi da fabrica

11 Dum. da fabrica no. 053/2018, Prelevaziun d'aua our d'auals da surfatscha (Val Pitschna e Val Gronda), Meglioraziun Tschlin

Contrat da concessiun per retrar l'aua da sauaziun

A chaschun da sia sezzüda dals 28 da schner 2020 ha il manader tecnic preschantà il sböz dal contrat da concessiun per la prelevaziun d'aua i'l territori da Val Pitschna e Val Gronda. Il contrat es gnü suottamiss a la suprastanza culla proposta d'ir d'accord cul cuntgnü e da til suottametter a la radunanza. Armon Mayer exprima seis dubis in connex culla quantità d'aua minimala da 30 l/s (Val Pitschna e Val Gronda) obain 50 l/s (Val Puntstot) chi ha da fluir i'l aual, davo cha quel da Val Pitschna e Val Gronda sun units in ün let. Tenor il proget da meglioraziun es previs da sviar l'aua da la Val Gronda illa Val Pitschna. Quist punct manca i'l contrat da concessiun. Sainza quella

masüra es da preverer cha l'aua da Val Pitschna nu maina adüna aua. Las quantitats minimalas d'aua sun gnüdas decretadas tras l'uffizi chantunal. Il cumün ha surtut quellas valurs analog illa concessiun. Quel decret es eir gnü protramiss a la società da meglioraziun Tschlin. Da güdichar scha las valurs definidas sun adequatas es roba da quels chi han evaluà las valurs e nu suottastà a la respunsabilità dal cumün.

La suprastanza decida d'ir d'accord cul cuntgnü dal contrat e da suottametter quel a la radunanza.

0220 Uffizi da fabrica

12 Dum. da fabrica no. 052/2018, Prelevaziun d'aua our d'auals da surfatscha (Val Puntsot), Meglioraziun Tschlin

Contrat da concessiun per retrar l'aua da sauaziun

Analog a la tractanda survart decida la suprastanza d'ir d'accord cul cuntgnü dal contrat per la Val Puntsot. Eir quist contrat dess la cumischiun da meglioraziun Tschlin examinar avant co ch'el vegn suottamiss a la radunanza.

9630 Stabels da la facultà da finanzas

13 Sanaziun don d'aua sala polivalenta Tschlin

Dumonda da credit

Il manader tecnic spiega il problem in connex cull'aua chi aintra illa sala polivalenta a Tschlin. Quella sfuondra sülla piazza sur il fabricat chi colliu la chasa da scoula culla sala polivalenta e sorta i'l stabilimaint pro l'entrada illa sala polivalenta. Insembel cun Albert Mayer sun gnüdas discussas, a chaschun d'üna visita occulara, las pussibilitats per reparar quai. Tenor l'offerta per la varianta pitschna s'amuntan ils cuosts sün raduond fr. 13'300.00. Schi's vezzess d'ürant quellas lavurs chi'd es da refar tuot la piazza per cumadar il don, schi s'augmantessan ils cuosts sün ca. fr. 120'000.00 (offerta Albert Mayer CHF 91'000.00 + asfaltaziun CHF 27'000.00).

La suprastanza decida da suottametter a la radunanza la varianta gronda in fuorma da dumonda da credit.

0220 Uffizi da fabrica

14 Proget via da velos Ischla Rov - Strada

Posiziun da l'uffizi per la natüra e l'ambiant

La suprastanza nu va d'accord culla posiziun da l'uffizi per la natüra e l'ambiant. Ella decida ch'in ün prüm pass es da contactar ils participants da la sezzüda a Cuaira, dimena a Richard Atzmüller e Remo Fehr. Scha quai nu maina ingüns resultats schi esa d'infuormar l'uffizi chantunal (ANU) in scrit cun copcha al corespondent cusglier guvernativ sur da nos parair.

2100 Scoula

15 Proget strategia scoula da Valsot e lös da scoula Ramosch e Strada

Elecziun da la gruppa da lavur

Il manader tecnic ha gnü ün aboccamaint culla mainascoula in connex cul proget d'ingrondimaint da la chasa da scoula a Strada. La mainascoula exprima il giavüsch da pudair cumanzar bainbod cullas lavurs da proget. Il capo manzuna cha sclerimaints in connex cul avegnir da las scoulas in nossa regiun han demuossà cha'l s-chalin ot restarà in mincha cas a Valsot, la capacità da l'infrastructura a Scuol nun admetta da tour sü amo plüs scolars.

La suprastanza decida da metter insembel üna gruppa da lavur. A quista fan part la mainascoula Gianna Rauch Poo, Fadri Riatsch, Armon Kirchen, ed il president dal cussagl da scoula Flurin Nef.

La grupp da lavur a d'examinar scha'l chantun spordscha sustegn in connex culla progettaziun. Per pudair planisar e realisar quist proget in möd radschunaivel e sistematic, es da tscherchar ün architect chi'd ha experienza cun progets da quist gener. I'l budget dal 2020 es gnü fat bun üna summe da fr. 20'000.00 pel proget.

7201 Provedimaint d'aua persa

16 Sarinera Martina
Bieraria Tschlin

Davo chi d'eira gnü constatà cha las valurs da l'aua illa sarinera a Martina sun parzialmaing fich precaras, es gnü fat ün'installaziun per observar quellas. In quist connex sun gnüdas fattas masüraziuns da las valurs da l'aua persa da la Bierreria Tschlin SA. Quellas valurs varieschan ferm tanter fich asch e fich basic. La sostanza da la chanalizaziun e sarinera patischa suot quistas circumstanzas. Consequentamaing es da preverer cha quist fat chaschuna plü bod o plü tard ots cuosts da sanaziun al cumün. A la Bierreria Tschlin SA es gnü concess davart da l'uffizi per la natüra e l'ambient ün termin. Sco prüm han els d'inoltrar actas prol uffizi per muossar sù co chi prevezzan da schoglier quist problem. Scha quai vegn acceptà in quel segn, sun els obliats da realisar quellas masüras fin la fin da l'on.

Il manader tecnic manzuna cha implü sun eir las valurs da l'aua chi aintra illa sarinera fich otas, chaschunà vegn quist problem dals rest da la produenziun da la bierra. Quels vegnan schlavats oura dals tancs e rivan uschè illa sarinera. La quantità da la belma chi riva illa sarinera vegn uschè dozzada fermamaing. Eir scha la sarinera es gnüda dimensiunada generusamaing vegn bainbod raggiunt il limit da la capacità. Our da motivs chi'd es previs d'augmantar la produenziun da biera, gnarà quist problem pegiorà. Armon Mayer manzuna cha per schoglier quist problem exista la pussibilità d'installar ün indrizi per filtrar la biera cun tilla svöder intuorn our dal tanc da produenziun. Quai chi rest'aint il filter as po allontanar sùt e na laschar cullar tras la chanalizaziun fin illa sarinera. Ün effet supraplù es chi's perda uschè qualche liters damain biera.

La suprastanza decida cha quist cumport nu vegn tolerà. A la Bierreria Tschlin SA es d'avertir ch'els han da pisserar chi gnian accumuladas las pretaisas fattas davart da l'uffizi per la natüra e l'ambient. Schi nu vegn agradi a quellas es da far quint cha'l permiss per la Bierreria Tschlin SA vegn aboli tras l'uffizi surnomnà. Fadri Riatsch, chi'd es commember dal cussagl administrativ da la società, piglia per mans la chosa.

0120 Executiva

17 Orientaziuns

Avegnir butia Ramosch

Il manader administraziun manzuna, cha in connex cullas lavurs da salvamaint da la butia a Ramosch ha la grupp da lavur causà cuost pro l'administraziun cumünala. L'administraziun vaiva güdà cun eriger glistas da proprietaris/proprietarias da seguondas abitaziuns, cun publicchar texts i'l mas-chalch, cun scrire, squitschar, pakettar aint e francar la posta per la populaziun e.u.i.. Ils cuosts fin al di dad hoz s'amuntan a raduond fr. 1'400.00.

Il capo es da l'avis, chi nun es correct da metter in quint quels cuosts ad üna società chi'd es gnüda fondada pür davo cha'ls cuosts sun gnüts causats. El propuona da desister da metter in quel segn in quint quellas spaisas e d'incleger quai sco contribuziun davart dal cumün. La suprastanza va d'accord culla proposta dal capo.

Sanaziun da la via i'l territori da Vadrain

Armon Mayer manzuna ch'el haja, tenor discussiun cul manader tecnic, contactà l'uffizi per la natüra e l'ambient. In quist connex es previs d'allontanar il beton chi d'eira gnü dovrà per construir la via. Davart dal uffizi chantunal (ANU) vegn pretaiss cha'l beton vegn allontanà tenor ledscha

d'immundizchas. In che möd cha la lavur in quinst connex vegn scrit'oura dess amo gnir ponderà. Il manader tecnic sclerischa la chosa.

Avegnir chasa da scoula Tschlin

Armon Kirchen manzuna chi haja gnü lö üna sezzüda cul cussagl administrativ dal Baineser. A chaschun da quella es gnü spiegà als preschaints, cha per cuntinuar culla lavur han els d'inoltrar in scrit üna survista da lur intenziuns. Implü vegn pretais ch'els han da surdar a la grupp da lavur plans, chi demuossan che adattamaints chi sun previs. La charta cun lur intenziuns es entrada pro cumün, ils plans nu sun invezza amo entrats, il termin d'eira per els massa cuort. Da l'acquist da la chasa da scoula vegn be fat adöver, schi vegn pussibiltà ad els da realisar ün'aigna sala sülla piazza naira. Els dumondan da tschüffer resposta davart dal cumün fin ils 20 da marz 2020. In connex cullas lavurs da percellaziun e d'adattamaint da la zona nun es quel termin però realistic. Appaina cha'ls plans sun avantman decida la grupp da lavur co proseguir in chosa.

Restorant a vinadi

Il capo manzuna chi saja gnü constatà chi resideschan persunas i'l stabilimaint dal restorant Weinberg a Vinadi. Sclerimaints tras la cumischiun da privel han demuossà, cha lavuraints d'üna ditte chi lavura in incumbenza dal GKI, stan per la dürada da l'incumbenza, in tal stabel. Our da motivs da privel da lavinas ed in connex cullas pretaisas d'avart da l'uffizi per la sgürezza da vivondas e per la sandà d'animals, es d'examinar, scha quist fat es tolerabel. In fin cha quists sclerimaints nu sun gnüts fats, nun es admiss da star in chasa. Ils alloggiaders han da gnir infuormà in quist sen. Il proprietari vegn orientà cun charta racumandada in quist sen.

Radunanza generala Pro Terra Engiadina

Il capo orientescha cha la radunanza generala da la Pro Terra Engiadina chatta lö als 26 da mai 2020 a Chant Sura.

0120 Executiva

18 Varia (suprastanza cumünala)

Da la tractanda nu vegn fat adöver.

7556 Ramosch, 06.03.2020



Il capo:

Il manader administraziun: